

İOANI XİBİMCİ NAMAK' Bəşin əyit

İoani me namak'al süft'in p'ə namak'allarik' həysət'in T'urşiya bakala Efesa, İsusı nanaxun bakalt'uxun təxminən 90 usen oşane şameşe. Me namak' nə süft'in namak'allarik' bütüm vëbakalxoynak' tene, nəəl p'əmci namak'allarik' maninesa vëbakalxoy cəmiyəteynak'. Me namak'a İoanen Gay s'iyen sa amdareynak'e şame. Şot'in me amdari seri yaq'a baksuna, İsusa q'abulbi Q'onçuğoy sakala işiği boş yəşəyinqbsuna ibaki heq'ədər müq baksunaxune şame.

Alimxoy fikiren me Gay uk'ala amdar bakes banekon maninesa vëbakalxoy cəmiyətin üzvine, namak'i boş iz s'i duğəğala Diot'ref isə t'e cəmiyəti kalat'oğoxun soğə. İoanen iz amdarxo t'e cəmiyətə karoozbi İsusı Müq Xavara yəymışbseynak'e yaq'abey. Diot'refen isə şot'oğoy zombsuna q'abultenebsay, cəmiyətəxunal şuk'k'ala şot'oğə ümüxlaxsa tene barey. Qavuna mandi me amdarxo İsus Xrist'osi Çark'est'al baksuna ük'in vëbakala, me zombsuni seri baksuna q'abulbala Gayene iz k'oya q'onağbsa, şot'oğə lazım bakala hörmətəne ak'est'a.

İoanen namak'a Gaya tərifbsunaxune burqsa, oşa şot'aynak' Diot'refi iz yaq'abi amdarxo

saal şot'oğoy Seri Bakalt'ay barada uk'alt'oğonu q'abulbsunaxune şame. Namak'i axı rast'a İoanen iz s'iya duğala Dimit'ri isə bakes banekon ki, Gaya me namak'a p'ap'esp'i amdare.

¹ Zaynak' əziz bakala Gay, me namak'a şamk'ala, vi Seri Bakalt'u çalxi düz yaq'a baksuna görə va gele çureğala ağsaq'q'alaxun xeyirq'an baki.

² Zaynak' əziz bakala dost', afırızne ki, vi əşurxo saat'q'an taşı, Buxaçuğon vi elmoğon maq'an laft'i, vi bədənəl vi uruf k'inək' sağlamq'an baki.

³ Beşi viçimoğon hari vi seri bakala zomb-sunaxun nu c'eri Şot'ay laxi yaq'en taysuna zaynak' exlətp'at'an gele müqezbaki.

⁴ Zaynak' bezi əyloğoy düzgün bakala yaq'en taysuna ibaksunaxun kala müqluğ teno.

Gaya tərifbsun

⁵ Zaynak' əziz bakala dost', hun bezi yaq'abi, vi nu çalxala amdarxoynak' bit'oğon vi düzgün yaq'axun nu c'eysunane ak'est'a.

⁶ Şot'oğon hari vi içoğon ak'est'i hörməti barada miya bakala cəmiyyətəynak' exlətt'unbi. Həysəəl şot'oğon Müq Xavara karoozbseynak' İsusə çalxalt'oğoy s'iya layiğ yaq'abadayin saat' sa əş biq'in bapon.

⁷ Axırı şorox me yaq'a c'eğat'an buxaçuxsuzt'oğoxun hik'k'al tet'un ext'i, içoğoy sa məxsədə buy - amdarxo Xrist'osa çalxest'un.

8 Metər amdarxo köməybsun beşi borce, şot'aynak' ki, şot'oğoy q'a beşi niyət sane - Mıq Xavara karoozbsun.

Diot'ref q'a Dimit'ri

9 Zu me pit'oğoy barada cəmiyəteynak' şamezpi, ama içü cəmiyətin kalo bi Diot'refen beşi amdarxo q'abulbsun çurtenesa.

10 Kiya hevaxt' eğayiz şot'ay biq'ala əşurxoy barada exlətp'oz: hetəre beşi barada əfçi əyitmux yəymişi amdarxo yaxun irapst'a. İzi yax nu q'abulbsun t'ödx, hələ sa q'abulbalt'oğoval bartenne, amdarxo cəmiyətəxun şəp'esunene q'ıdest'a.

11 Zaynak' əziz bakala dost', ama hun pist'oğollarik' təə, şaat't'oğollarik' hərəkətbə. Şaat' əş biq'alo Buxaçuğoxune, pislug balo isə Buxaçuğoxun əxile.

12 Bəğa, Dimit'rin barada bitot'in şaat'e əyite, izi düzgün yəşəyinşbsunenal mot'o ak'esest'a. Yanal mot'oğə beşi piin ak'i me barada şahidluğyanbsa, beşi uk'alt'oğoy seri baksuna isə avanu.

Dirist'oğonbsun

13 Vaynak' şamk'ala gele əyitmuxzax bu, ama mot'oğə namak'en upsun tez çuresa.

14 Buxaçuğon bark'ayin usumluğen suna ak'i exlətp'es bakalyan.

15 Vaynak' serluğez arzubsə. Miya bakala dost'urxon vaynak' dirist'uğt'un yaq'absə. Hunal kiya bakalt'oğoy bitova zaxun tək-tək dirist'uğ upa.

Udi Bible
Udi Scripture translation

copyright © 2020 Translation Services International Ltd. and Wycliffe Bible Translators, Inc.

Language: (Udi)

Contributor: Wycliffe Bible Translators, Inc.

All rights reserved.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025

174556f0-71b4-5f1c-b512-2117b07ebbf0